

## Uorden da scola dil Consorzi da scola superiura *scolaviva* dallas vischnauncas da Laax, Falera, Sagogn e Schluein

Sebasond sin igl art. 20 dalla Lescha davart las scolas popularas dil cantun Grischun (Lescha da scola) dils 21 da mars 2012.

Las indicaziuns da persunas, funcziuns e professiuns en quei uorden da scola serefereschan ad omisduas schlatteinas, num ch'ei seresulti enzatgei auter ord il senn dils singuls artechels.

### I. Disposiziuns generalas

#### Art. 1

Scalems da scola Il consorzi da scola meina in scalem secundar I (scalem superiur).

#### Art. 2

Obligaziun  
d'ir a scola,  
liug da scola,  
gratuitadad

L'obligaziun d'ir a scola, il liug da scola e la gratuitadad sedrezzan tenor il dretg cantunal.

#### Art. 3

Structuras dil di

En cass da basegns porscha il consorzi da scola ulteriuras structuras dil di. La contribuziun communal vegn pagada dalla vischnaunca respectiva.

#### Art. 4

Purschidas  
supplementaras

<sup>1</sup> En cass da basegns sa il consorzi da scola crear purschidas supplementaras sco lavur sociala da scola ni purschidas da time out.  
<sup>2</sup> En cass da basegns vegn endrizzau purschidas specialas per scolars cun duns particulars.

#### Art. 5

Mesiras pedagogicas specialas  
el sector sempel

Per ordinar e realisar las mesiras pedagogicas specialas el sector sempel ei il consorzi da scola responsabels.

#### Art. 6

Giudicament,  
promoziun  
e midada

Il giudicament sco era la promoziun e la midada dils scolars ad auters scalems da scola succedan tenor il dretg cantunal.

Relaziun  
d'engaschament

**Art. 7**

<sup>1</sup> Las personas d'instrucziun ein emploiadas dil consorzi da scola.

<sup>2</sup> Per las personas d'instrucziun vegnan las disposiziuns dalla legislaziun cantunala dil personal applicadas confuorm al senn.

**II. Direcziun dalla scola**

Direcziun  
dalla scola

**Art. 8**

<sup>1</sup> La direcziun dalla scola vegn nominada dil consorzi da scola.

<sup>2</sup> Per la direcziun dalla scola vegnan las disposiziuns dalla legislaziun cantunala dil personal applicadas confuorm al senn, num ch'il carnet d'obligaziuns dil menader da scola prescrivi enzatgei auter.

**III. Cussegl da scola**

Organisaziun

**Art. 9**

<sup>1</sup> Il cussegl da scola secumpona da mintgamai in representant da mintga vischnaunca dil consorzi. Il cussegl da scola vegn presidiaus dil president dil cussegl da scola. Il cussegl da scola seconstituescha sez.

<sup>2</sup> Il cussegl da scola vegn convocaus dil president dil cussegl da scola, e quei aschi savens sco necessari tut tenor las fatschentas ni sin giavisch d'in commember dil cussegl da scola.

<sup>3</sup> Per regla separticipescha la direcziun dalla scola cun vusch consultativa allas sesidas dil cussegl da scola.

<sup>4</sup> Las sesidas vegnan protocolladas.

Habilitad  
da decider

**Art. 10**

Il cussegl da scola ei habels da decider, sche silmeins treis commembers ein presents. En cass da paritad dallas vuschs en damondas specificas decida il president, tier elecziuns vegn tratg la sort.

Obligaziuns e  
cumpetenzas

**Art. 11**

<sup>1</sup> Il cussegl da scola meina e survigilescha la scola ed exequescha la legislaziun cantunala e communal da scola. El ademplescha tut las incumbensas dils fatgs da scola, num che quellas seigien delegadas ad in'otra autoritad ni instanza entras decrets cantunals ni comunals.

<sup>2</sup> Il cussegl da scola ha cunzun las suandontas incumbensas:

1. decider davart la midada e l'adattaziun dil model da scola;
2. decider sch'in affon surdumandau duei cuntinuar igl onn da scola en ina classa pli bassa;
3. decider sch'in affon sa sursigliar ina classa;

4. decider davart purschidas supplementaras per affons da lungatg jester;
5. concluder l'ordinaziun e l'annullaziun da mesiras pedagogicas specialas el sector sempel;
6. decider sch'in affon duei vegnir exclus dalla scola durant il temps da scola obligatori;
7. decider sch'in affon duei vegnir relaschaus anticipadamein dalla scola il pli baul suenter 8 onns da scola obligatori;
8. decider sch'in affon sa frequentar ulteriurs onns da scola suenter ch'il temps da scola obligatori ei cumplenus;
9. decider sch'in affon duei vegnir exclus dalla scola durant il temps da scola postobligatori;
10. decider davart la recepziun d'in affon d'in auter purtader da scola e davart la taxa da scola;
11. fixar las vacanzas – cun excepziun dallas vacanzas d'atun e da Nadal – en convegnientscha ed en coordinaziun cun ils cussegls da scola dalla regiun e declerar che occurrenz specialas da scola durant suentermezdis libers e durant sondas seigien obligatorias;
12. fixar il temps d'instrucziun per di;
13. decretar in reglament d'absenzas e da congedi;
14. decretar in uorden disciplinar;
15. decretar in reglament davart las structuradas dil di inclusiv igl uorden da tariffas;
16. engaschar e relaschar las personas d'instrucziun e la direcziun dalla scola;
17. decretar in carnet d'obligaziuns per la direcziun dalla scola;
18. decretar in reglament davart il perfecziunament ed il congedi da perfecziunament dallas personas d'instrucziun e dalla direcziun dalla scola;
19. decretar autras prescripziuns ed auters reglaments che survechan al menaschi da scola;
20. sancziunar surpassaments encunter igl artichel 68 dalla Le-scha cantunala da scola;
21. far il preventiv ed il quen annual per mauns dallas vischnancas dil consorzi;
22. eleger il miedi da scola ed il dentist da scola.

## **Art. 12**

Presidi

<sup>1</sup> Il president dil cussegl da scola representa il consorzi da scola anoraviars, prepara las fatschentas dil cussegl da scola e procura ch'ils conclus prendi vegnien exequi.

<sup>2</sup> En cass urgents, per ils quals il cussegl da scola ei responsabels, pren il president dil cussegl da scola las mesiras necessarias. Aschi-navon sco pusseivel decida il cussegl da scola definitivamein en caussa a caschun dalla proxima sesida.

#### **IV. Giurisdicziun**

##### **Art. 13**

Via giudiziala

<sup>1</sup> Encunter disposiziuns e decisiuns dallas persunas d'instrucziun, dalla direcziun dalla scola e dil president dil cussegl da scola en fatgs da scola san ins recuorer enteifer 10 dis tier il cussegl da scola.

<sup>2</sup> Encunter disposiziuns e decisiuns dil cussegl da scola en fatgs da scola san ins recuorer enteifer 10 dis tier il Departament cantunal d'educaziun, cultura e protecziun digl ambient, num che la Lescha cantunala da scola prescrivi enzatgei auter.

<sup>3</sup> Encunter decisiuns d'attribuziun negativas ed encunter disposiziuns concernent la nunpromozion ni la promozion san ins recuorer enteifer 10 dis tier igl uffeci responsabel.

#### **V. Disposiziun finala**

##### **Art. 14**

Entrada en vigur

Quei uorden da scola entra en vigur sin igl 1. d'uost 2014 suenter l'approbaziun entras las radunonzas communalas sco era entras il Departament cantunal d'educaziun, cultura e protecziun digl ambient.

Decretau dallas radunonzas communalas

da Laax dils 4 da zercladur 2014

Il president communal

Toni Camathias

Il canzlist

Rest Giacun Coray

da Falera dils 18 da zerladur 2014

Il president communal

Wendelin Casutt

Il canzlist

Adrian Vincenz

da Sagogn dils 5 da matg 2014

Il president communal

Hans Peter Casutt

Il canzlist

Claudio Cavelti

da Schluain dils 30 d'avrel 2014

Il president communal  
Bruno Wellinger

Il canzlist  
Augustin Beeli

Approbau dil departament d'educaziun, cultura e protecziun digl ambient tenor  
disposiziun dil departament dils 6 d'uost 2014.

Il schef:

Martin Jäger, cusseglier guvernativ